

Lungzlinz: Fanh Boux Beixnuengx Myauzcuz Angq Hoh Ciet Diuqbo

隆林：万余苗胞欢度传统跳坡节

2 nyied 11 hauh, ngoenz liggaueq ndwencieng cibngeih, youq Lungzlinz Gak Cuz Swciyen Mbanjdwnzgoz, fanh lai boux beixnuengx Myauzcuz daj Lungzlinz、Sihlinz、Gveicouh Anhlungz、Anhsun daengj dieg daeuj, doxcomz youq gizneix, ciengq go diuq foux, boq aenvenz, bin faexsoux, angq hoh Ciet Diuqbo Myauzcuz. Ngoenzde, caemh gawjbanh le baijyienj “buh gyaendei Myauzcuz” hozdung. Gyoengq beixnuengx Myauzcuz dawz buhvaq gyaendei gag guh haenx baijyienj hawj vunzlai yawj, yienh’ok le beixnuengx Myauzcuz gaenxguh、coengmingz、dinfwnz giujret haenx.

(Veiz Vancungh sij Cinz Yungj hoiz)



▲ Gyoengq dahsau Myauzcuz Gveicouh Anhsun youq gwnz hoihbo diuq foux yepyep, ndei yawj dangqmaz.



▲ Dahsau Myauzcuz baij gyaendei.

► Bin faexsoux ndei yawj youh ngaesusim vunz lailai.



Yungzsuij: Gak Cuz Beixnuengx Angq Hoh Ciet “Hoihbo” 融水：各族群众欢庆“坡会”节

2 nyied 12 hauh, Yungzsuij Myauzcuz Swciyen Anhdaï Yangh angq coux ma aenciet “cibsam hoihbo”, gak cuz ginzcung seiq henz yanghein doxcomz youq itheij, daenj buhmoq, ciengq go diuq foux, angq hoh bi moq. Gyoengq lwgnyez hix riengz bohmeah daeuj daengz gwnz “hoihbo”, boq venz diuq fouxcaijdangz, daj ndawde hagsib swncienz minzcuz vwnzva. “Hoihbo” dwg aen ciet conzdungj gak cuz lwgminz doxcomz guh’angq ndaw yienh Yungzsuij ndeu, ndawde, aeu Myauzcuz beixnuengx guhcawj. Moix bi hozdung daj ndwencieng cosam hainduj, daengz ndwencieng cibcaet guh sat. “Hoihbo” Myauzcuz daj 2006 nienz hwnj ndaej senj haeuj buek daih’it guekgya gaep feihvuzciz vwnzva yizcanj mingzloeg.

(Lij Binh sij Cinz Yungj hoiz)



▲ Myauzcuz beixnuengx angq boq venz.



◀ Myauzcuz beixnuengx bouxlaux lwgnyez angq diuq fouxcaijdangz.

Vujmingz: Nungzminz Ndaem Makgam Ndaej Baenzfouq

武鸣：种植柑橘富农民



▲ Bouxndaemmak Loz Vwnzsan youq ndaw suenmak mbaet mak.

Vujmingz Yen Sanghgyauz Cin yawj dieg dajndaem, lai ndaem makgam, yinx binjcungj makgam ndei Gammouguz ma ndaem 600 moux, seizneix gaenq giet mak 150 moux, moix moux ndaej sou mak fanh lai gaen, moix gaen makgam ndaej gai 6.8 maenz, dan hangh souhaeuj neix, daengx mbanj nungzminz bouxvunz ndaej demsou 2040 maenz.

(Liuz Gvangjmingz)

Lozcwngz: Eu Fwen Danqhaenh Ndwenngoenz Ndei

罗城：山歌歌颂幸福生活

Mboengqgonq, Lozcwngz Mulaujcuz Swciyen youq ndaw yienh gvangjangz gawjbanh aen hoihfwen aeu “siengjmuengh Cungguk” guh cawjdaez ndeu, 36 boux canghfwen ndawbiengz daj Bwzswz、Yizcouh daeuj haenx daenj buh moqsaksak, doxcomz youq itheij doiq fwen. Gyoengqde eu fwen danqhaenh cwngcwz ndei dangj, danqhaenh youq dangj lingjdauj baihlaj, ndawbiengz daihbingz、lwgminz vuenyungz, danqhaenh siengjmuengh Cungguk, caemh eu fwen angq hoh bi moq.

(Mungz Cwnghsih sij Cinz Yungj hoiz)



▲ Boux canghfwen eu fwen danqhaenh cwngcwz ndei dangj.